

等但當勤而行之。若於山間。若空澤中。若在樹下。閒處靜室。念所受法。勿令忘失。常當自勉。精進修之。無為空死。後致有悔。我如良醫。知病說藥。服與不服。非醫咎也。又如善導。導人善道。聞之不行。非導過也。

△_{丁三}釋義二。_{戊一}總分。_{戊二}別釋。

今初

論曰。顯示畢竟甚深功德者。有二種畢竟。顯示二種甚深功德故。一者如來分別說法畢竟功德。顯示非分別說法甚深功德。常說故。二者修行菩薩修世間功德畢竟。顯示餘者甚深功德。常修故。此二種修行功德。如上一一種中。各修二種功德應知。

總分中。初總標二種畢竟者。教主常說。弟子常修。皆究竟故。隨一種中。顯示甚深。故亦有二。一。下別列。初中分別說法。即上世出世等。示非等者。諸法寂滅。離意言分別。應機故說。機差故別。推說由機。雖別非別。既非分別。故不礙常說也。二中世間功德。即前第二分。餘者甚深。即第三分。出世功德。此下通結。此二種者。即世出世間。如上一一者。即前二分。諸段行法。每一段中。皆具常說常修。故云各修二種也。

△_{戊二}別釋二。_{己一}略示。_{己二}廣說。

初中二。_{庚一}菩薩常修。_{庚二}如來常說。

今初

是中常修功德者。第一義心修故。如經。汝等比丘。於諸功德。常當一心故。遠離一心。相似相違行。如怨故。如經。捨諸放逸。如離怨賊故。

略示中。初明常修。第一義心。謂稱理心。經文上二句勸修。下二句勸捨。故云遠離等。相似行。即癡無記。兀爾無覺。似理心故。相違行。即貪瞋有記。隨境起惡。違理心故。釋經諸放逸也。如怨者。能害慧命。是可離故。

△^{庚二}如來常說。

無限齊。大悲常利益。限齊畢竟故。如經。大悲世尊所說利益。皆已究竟故。

次明常說。無限齊者。橫遍生境。豎窮無際故。限齊畢竟者。一期始終。機盡化息故。

△^{己三}廣說二。^{庚一}菩薩常修功德。^{庚二}如來常說功德。初中二。^{辛一}總舉。^{辛二}別釋。今初

次復廣說常修功德。有七種修相。

次廣說中常修有七。前五示修相。後二明警策。

△^{辛二}別釋七。^{文如}

一者云何修。示現常勤行故。如經。汝等但當勤而行之故。二者於何處修。示無事處故。如經。

若於山間。若空澤中。若在樹下。閒處靜室故。三者何所修。示修真實。無二念法故。如經。念所受法故。四者何故修。修令現前故。如經。勿令忘失故。五者以何方便修。如經。常當自勉。精進修之故。六者於相似法處。蘇息。遠離上上心故。如經。無為空死故。七者於晚時。自知有餘悔。不及事故。如經。後致有悔故。

一示修門。二明修處。經列五種。上三局蘭若。下二通喧靜。空澤即水畔。三明修法。觀諸法空。故云真實。或隨所學。大小乘觀法。無非真實。皆須繫心一境。故無二念。四明勤修意。五明修之方便。六中相似法。即取空死者。以譬已故。蘇謂蘇省。息謂止息。觀他徒死。而省己息惡。對治極重放逸之心。故云遠離上上也。七中晚時自知者。或約衰老。或取將終。有餘悔者。言其甚也。老則力衰。死則時促。雖悔無濟。故云不及事也。

△^{庚二}如來常說功德二^{辛二}牒釋^{辛二}點示。

今初

次廣說如來分別說法功德畢竟。示現二種畢竟相。一者說化法畢竟。相應無餘故。如經。我如良醫。知病說藥。服與不服。非醫咎也故。二者與念畢竟度法。相應無餘故。如經。又如善導。導人善道。聞之不行。非導過也故。

次常說中。初說法者。即前世出世法。指過垂範。故云化法。二與念畢竟度法者。即化法中諸對治門。破障入道。故云度法。說法擬病。故如良醫。說觀示道。故如善導。兩云相應。謂不差機。兩云無餘。謂皆盡理。言善導者。謂引路之人。亦名導師。

△_{辛二}點示。

是中服與不服等。示現如來。於二種畢竟中。無過失故。不負眾生世間法故。

次科。服不服等。等取聞之不行。無過失即契理。不負眾生即契機。隨宜說法。依世假名。故云世法。

△_{丙五}顯示入證決定分三。_{丁一}標章。_{丁二}舉經。_{丁三}釋義。

今初

次說顯示入證決定分。

△_{丁二}舉經。

經曰。汝等若於苦等四諦有所疑者。可疾問之。毋得懷疑。不求決也。爾時世尊如是三唱。人無問者。所以者何。眾無疑故。時阿菟樓駄。觀察眾心。而白佛言。世尊。月可令熱。日可令冷。佛說四諦不可令異。佛說苦諦實苦。不可令樂。集真是因。更無異因。苦若滅者。即是因滅。因滅